

MPN/mag

**ACTA DA SESIÓN ORDINARIA DA COMISIÓN INFORMATIVA DE COOPERACIÓN
MUNICIPAL, COOPERACIÓN TRANSFRONTEIRIZA E COHESIÓN SOCIAL DO DÍA
18/03/2022**

ASISTENTES

PRESIDENTE:	D. Santos Héctor Rodríguez Díaz
SUPLENTE	D ^a . Olga María García Ballesteros
VOGAIS:	D ^a . Ana María Mejías Sacaluga D. Gorka Gómez Díaz D ^a . Raquel Giráldez Armas D. Manuel González Martínez D. Gregorio Agís Gómez D ^a . Iria Lamas Salgueiro D. José Carlos López Campos D. Jorge Cubela López D. Manuel Alejandro Lorenzo Alonso D ^a . María Paz Lago Martínez D. Ignacio Maril Pardo D. José Alfonso Marnotes González D. Javier Tourís Romero D. Xosé Cesáreo Mosquera Lorenzo D ^a . María Ortega Iñarrea, en substitución de D. Uxío Benítez Fernández

Sendo as doce horas e cinco minutos do día dezaioito de marzo do ano dous mil vinte e dous, reúnen-se no Pazo Provincial os Sres./as. Deputados/as arriba relacionados, en sesión extraordinaria, e baixo a Presidencia de D. Santos Héctor Rodríguez Díaz. Actúa como secretaria a xefa do Servizo de Cooperación, D^a. Marina Piñeiro Novo.

Aberta a sesión polo Presidente, pásase ó estudo dos asuntos incluídos na Orde do Día, sobre os que recaeron os seguintes ditames:



1.- APROBACIÓN DA ACTA ANTERIOR

Apróbase a acta da sesión anterior correspondente á sesión extraordinaria celebrada o dezaoto de febreiro do ano dous mil vinte e dous co voto favorable de todos os membros da Comisión.

2.- DITAMINAR A PRESTACIÓN DE CONFORMIDADE AO PROXECTO REFORMULADO PRESENTADO POLO CONCELLO DE REDONDELA DA ACTUACIÓN DENOMINADA "HUMANIZACIÓN DA RÚA PICOTA, PRAZA DA FONTE DO MOURO E CONTORNA DA CAPELA DE SANTA MARIÑA", NO MARCO DO PROGRAMA REACPON (REACCIONA PONTEVEDRA PROVINCIA) (expediente 2021040015)

Sométese ao ditame da Comisión Informativa de Cooperación Municipal, Cooperación Transfronteiriza e Cohesión Social a seguinte proposta de acordo, de conformidade co establecido nos artigos 123 a 126 do Real Decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das Entidades Locais, con carácter previo á súa elevación ante o Pleno para a súa aprobación:

"ASUNTO: PRESTAR CONFORMIDADE AO PROXECTO REFORMULADO PRESENTADO POLO CONCELLO DE REDONDELA DA ACTUACIÓN "HUMANIZACIÓN DA RÚA PICOTA, PRAZA DA FONTE DO MOURO E CONTORNA DA CAPELA DE SANTA MARIÑA", AO ABEIRO DO PROGRAMA REACPON (REACCIONA PONTEVEDRA PROVINCIA) (EXPTE. 2021040015)

ANTECEDENTES

O Pleno da Corporación Provincial, mediante o acordo núm. 4.7719 adoptado na sesión extraordinaria do 17/12/2021, concedeu unha subvención polo procedemento de concorrencia competitiva ao Concello de Redondela con destino á execución da actuación denominada "Humanización da rúa Picota, praza da Fonte do Mouro e contorna da Capela de Santa Mariña", segundo o proxecto redactado no mes de xullo de 2021 e emendado no mes de outubro de 2021, para dar cumprimento ao establecido no requirimento de emenda feito polo Servizo de Cooperación da Deputación, ao abeiro do Programa provincial de infraestruturas e dotacións singulares para a recuperación post-Covid-19 – Programa ReacPon (Reacciona Pontevedra Provincia) (expte. 2021025615).

En setembro de 2021 a Dirección Xeral de Patrimonio Cultural da Xunta de Galicia informou favorablemente a realización das obras, non obstante, coas condicións e reparos indicados no propio informe.

O orzamento do investimento ascende a 849.254,38€ e a subvención concedida a 636.940,79€, completándose o financiamento mediante unha achega municipal por importe de 212.313,59€.

De acordo co previsto na base reguladora 7ª.2.h) do Programa ReacPon, mediante a resolución



presidencial núm. 2022000332 de 20/01/2022 aprobouse o correspondente convenio de colaboración co fin de definir as actuacións obxecto de subvención e concretar de xeito pormenorizado as obrigas das partes, o cal se asinou o día 26/01/2022.

En data 10/03/2022 o concello presenta no Rexistro da Deputación (núms. rexistro WEB2022013098, WEB2022013102, WEB2022013105, WEB2022013106, e WEB2022013110), un proxecto reformulado redactado en data 04 de febreiro de 2022 (en data 11/03/2022 (núm. rexistro WEB2022013414 presenta o mesmo proxecto, pero unificado nun único documento), para adaptalo ás condicións e aos reparos establecidos no referido informe favorable da Dirección Xeral de Patrimonio Cultural da Xunta de Galicia, que mantén invariable o orzamento inicial, e a resolución da alcaldía de aprobación do dito proxecto.

En data 11/03/2022 o concello presenta no Rexistro da Deputación (núm. rexistro WEB2022013387) a resolución da Dirección Xeral de Patrimonio Cultural da Xunta de Galicia, de autorizar as obras de acordo co cumprimento das condicións recollidas no corpo da resolución notificada.

Examinado o proxecto pola Comisión de persoas expertas do Programa ReacPon na data 14 de marzo de 2022, acórdase que procede dar conformidade ao proxecto presentado, tendo en conta, entre outras consideracións, "que os cambios introducidos dan resposta aos condicionantes impostos pola Dirección Xeral de Patrimonio Cultural, Servizo Protección e Fomento da Consellería de Cultura, Educación e Universidade; e afectan principalmente ás características estéticas, aos materiais, ás cores e aos acabados", "que, tendo en conta que a superficie da zona de usos peonís non se modifica, nin cambian os aspectos técnicos, o grao de madurez, os obxectivos propostos da Axenda 2030, as políticas panca afectadas nin os principios Ágora que o proxecto promove; mantéñense os criterios de valoración fixados nas bases da convocatoria do Programa ReacPon e polo tanto a puntuación obtida non se modifica", "que estes cambios non modifican o orzamento de licitación".

En data 15/03/2022 o enxeñeiro de camiños, canais e portos adscrito a Intervención emite informe considerando que "os cambios introducidos no proxecto non modifican a puntuación obtida na baremación de acordo ós criterios de valoración fixados nas bases da convocatoria", e o 15/03/2022 a Intervención provincial emitiu informe de fiscalización favorable do expediente.

Sométese, así mesmo, ao ditame da Comisión Informativa de Cooperación cos Municipios, Cooperación Transfronteiriza e Cohesión Social.

FUNDAMENTOS DE DEREITO

Réxime xurídico

Lei 38/2003, de 17 de novembro, Xeral de Subvencións (LXS), e o seu Regulamento aprobado por Real Decreto 887/2006, de 21 de xullo (RLXS)

Lei 9/2007, de 13 de xuño, de Subvencións de Galicia (LSG), e o seu Regulamento aprobado por Decreto 11/2009, de 8 de xaneiro (RLSG)



Lei 7/1985, de 2 de abril, Reguladora das Bases do Réxime Local (LRBRL)

Lei 39/2015, de 1 de outubro, do Procedemento Administrativo Común das Administracións Públicas (LPACAP)

Lei 40/2015, de 1 de outubro, de Réxime Xurídico do Sector Público (LRXSP).

Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)

Real Decreto Lexislativo 781/1986, de 18 de abril, polo que se aproba o texto refundido das disposicións legais vixentes en materia de Réxime Local (TRRL)

Real Decreto Lexislativo 2/2004, de 5 de marzo, polo que se aproba o Texto Refundido da Lei reguladora das Facendas locais (TRLRFL)

Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP)

Ordenanza Xeral de Subvencións da Deputación de Pontevedra, aprobada no Pleno provincial do 28 de outubro de 2016 e publicada no BOPPO do 30 de decembro de 2016 (OXSDEPO)

Bases de execución do orzamento da Deputación para o exercicio 2022

Bases reguladoras e convocatoria do Programa Provincial de Infraestruturas e Dotacións Singulares para a Recuperación post-Covid-19 – Programa ReacPon (Reacciona Pontevedra Provincia)

Consideracións xurídicas

- **Instrución do expediente**

Base reguladora 7ª da convocatoria, pola que a instrución do procedemento correspóndelle á xefa do Servizo de Cooperación.

Petición e evacuación de informes

Artigos 79 e 80 da LPACAP, sobre a petición e a evacuación de informes.

Artigo 88.6 da LPACAP, que sinala que a aceptación de informes ou ditames servirá de motivación á resolución cando se incorporen ao texto da mesma.

Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.

Bases 47ª e 48ª de execución do vixente orzamento provincial, sobre o control e a fiscalización da xestión económica, que sinala a competencia da Intervención para realizar esta función.

Resolución do expediente

Artigo 2 da LSG, en concordancia co artigo 2 da LXS, que na definición de subvención vincula a disposición dineraria entre outros requisitos, a que a entrega estea suxeita ao cumprimento dun determinado obxectivo, a execución dun proxecto, a realización dunha actividade, ou a adopción dun comportamento singular, xa realizados ou por desenvolver, debendo o beneficiario cumprir as obrigacións materiais e formais que se estableceran.



Artigo 11.a) da LSG, en concordancia co artigo 14.1.a) da LXS, que establece como obriga do beneficiario cumprir o obxectivo ou executar o proxecto que fundamenta a concesión da subvención.

Artigo 64 do RLXS que dispón que unha vez recaído un acordo ou resolución de concesión pódese solicitar unha modificación do seu contido, de acordo co disposto nas bases reguladoras da subvención, e sempre e cando non se prexudique dereitos de terceiros e se solicite antes de que conclúa o prazo para a realización da actividade.

Artigo 16 da Ordenanza Xeral, respecto da modificación da resolución de concesión, pola que salvo que nas bases reguladoras, resolución de aprobación da convocatoria ou de concesión se estableza o contrario, o beneficiario poderá solicitar a súa modificación, non debendo variarse o destino ou finalidade da subvención. En concorrencia competitiva a modificación só será posible no caso de que non altere a puntuación obtida pola persoa beneficiaria por aplicación dos criterios de concesión.

Artigo 205 da LCSP, que recolle os supostos de modificacións non previstas nos pregos de cláusulas administrativas, así como os límites na alteración das súas contías.

Artigo 242.4 da LCSP, polo que de considerarse necesaria unha modificación do proxecto procederase á súa redacción e aprobación polo órgano de contratación.

Disposición Xeral 17ª das Bases Reguladoras do Programa ReacPon, segundo a cal, se xurdise a necesidade de modificar o proxecto, o concello deberá redactar e xestionar administrativamente, de acordo co establecido na normativa de contratos, a modificación do proxecto, que deberá ser aprobada polo órgano competente do concello. Tras a aprobación polo concello, a Deputación supervisará a modificación e, de ser o caso, dará a súa aprobación, sen a cal non será posible o pago da subvención.

Competencia para resolver

A competencia lle corresponde ao Pleno da Deputación, de acordo coa Base 16ª de execución dos orzamentos da Deputación para o ano 2022, en virtude do artigo 33 da LRBRL, 185 do TRLRFL, 117 e concordantes do TRRL, 61 do ROFRXEL, e da Disposición Adicional 2ª da LCSP.

Artigo 8.2 da OXSDEPO, que de conformidade co disposto no artigo 33 da LRBRL, artigo 10 da LXS e base 16ª de execución dos orzamentos da Deputación para o ano 2022, atribúe a competencia para resolver ao Pleno.

CONCLUSIÓNS

O proxecto reformulado presentado polo concello (aprobado pola resolución de alcaldía de data 10 de marzo de 2022), redactado no mes de febreiro, e que conta coa correspondente autorización da Dirección Xeral de Patrimonio Cultural da Xunta de Galicia, non altera nin a finalidade nin o obxecto para o que se outorga a axuda económica da Deputación.

O orzamento de licitación do novo proxecto correspóndese co orzamento do proxecto inicial, manténdose invariable o importe da subvención concedida.

A Comisión de persoas expertas acorda dar conformidade ao proxecto presentado, poñendo de



manifesto que os cambios introducidos non afectan aos criterios de valoración fixados nas bases da convocatoria do Programa Reitor e polo tanto a puntuación obtida non se modifica.

O proxecto preséntase antes de que remate o prazo de execución das obras acollidas no Programa ReacPon e co mesmo non se prexudican intereses de terceiros, nin se alteran as circunstancias que se tiveron en conta para a concesión da subvención. En consecuencia, non se prexudican os principios de igualdade, obxectividade e non discriminación, que deben rexer os procedementos de concesión de subvencións, e en particular no sistema de concorrencia competitiva.

Por todo o exposto, e á vista dos antecedentes e fundamentos de dereito sinalados, a acta da sesión da Comisión de persoas expertas de 14/03/2022 (CSV: WQ1729YDRO6BY131), o informe da xefa do Servizo de Cooperación de 14/03/2022 (CSV: O18KIC8HQ69CPYQN), o informe do enxeñeiro de camiños, canais e portos adscrito a Intervención de 15/03/2022 (CSV: XQXR99ABSSQoXIIHW), e o informe de Intervención de 15/03/2022 (CSV: 3O41TNLRMCE3VCM5), sométese ao ditame da Comisión Informativa de Cooperación Municipal, Cooperación Transfronteiriza e Cohesión Social a seguinte PROPOSTA DE ACORDO:

- PRESTAR CONFORMIDADE ao proxecto reformulado presentado polo Concello de Redondela da actuación "Humanización da rúa Picota, praza da Fonte do Mouro e contorna da Capela de Santa Mariña", ao abeiro do Programa ReacPon (Reacciona Pontevedra Provincia).
- DARLLE TRASLADO do presente acordo ao Concello de Redondela, a Intervención, ao Servizo de Cooperación e ao Gabinete de Presidencia."

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por unanimidade, cos votos a favor dos/as deputados/as do Grupo Provincial do PSdeG-PSOE (8), do Grupo Provincial do BNG (2), e do Grupo Provincial do Partido Popular (7), a proposta de acordo indicada "ut supra".

3.- DITAMINAR A APROBACIÓN DO CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA LEVAR A CABO AS OBRAS DE REMODELACIÓN DO VIARIO PERIMETRAL DA PRAZA DE BARCELOS (expediente núm. 2022005648)

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ó Ditame da Comisión Informativa de Cooperación



Municipal, Cooperación Transfronteiriza e Cohesión Social a seguinte proposta de acordo con carácter previo á súa elevación ante o Pleno para a súa aprobación

– **“ASUNTO: APROBACIÓN DO CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA LEVAR A CABO A REMODELACIÓN DO VIARIO PERIMETRAL DA PRAZA DE BARCELOS**

Do exame do expediente quedan acreditados os seguintes antecedentes:

- *No exercicio das súas atribucións, a Deputación Provincial de Pontevedra e o Concello de Pontevedra teñen o obxectivo compartido da remodelación do viario perimetral da praza de Barcelos. Esta intervención permitirá unha reorganización do espazo público acorde cos principios e criterios da rede Ágora, dotándoo dunha maior seguridade e accesibilidade.*
- *Para dar cumprimento ó obxectivo referido no parágrafo anterior a Deputación Provincial de Pontevedra e o Concello de Pontevedra desexan establecer as pautas de colaboración para levar a cabo a “**REMODELACIÓN DO VIARIO PERIMETRAL DA PRAZA DE BARCELOS**” e así, en data 04/02/2022 e núm de rexistro web 2022004444, o Concello de Pontevedra presenta pola sede electrónica unha solicitude e demais documentación necesaria para a formalización do devandito convenio. Asemade, segundo o proxecto de execución do referido investimento a estimación económica para a súa execución será de 2.071.876,00 €, IVE engadido, que segundo o previsto na proposta de convenio será financiado integramente pola Deputación, coa achega de 1.208.594,33 euros no exercicio 2022 e 863.281,67 euros no exercicio 2023.*
- *Revisada polo Servizo de Cooperación, a documentación achegada cumpre os requisitos esixidos pola normativa aplicable para a sinatura do convenio. A estes efectos a proposta de convenio infórmase pola xefa do Servizo de Cooperación. Asemade, o proxecto técnico foi supervisado polos servizos técnicos provinciais. Pola súa banda, solicítase a Intervención Xeral provincial, logo de dar conta dos antecedentes e normativa de aplicación, a fiscalización e conformidade do expediente.*
- *Someteuse ao ditame da Comisión Informativa de Cooperación cos Municipios, Cooperación Transfronteiriza e Cohesión Social para levar a cabo a “**REMODELACIÓN DO VIARIO PERIMETRAL DA PRAZA DE BARCELOS**”.*

FUNDAMENTOS XURÍDICOS

Lexislación aplicable

- *Lei 38/2003, de 17 de novembro, Xeral de Subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)*
- *Lei 7/1985, de 2 de abril, Reguladora das Bases do Réxime Local (LRBRL)*



- *Lei 5/1997, de 22 de xullo, reguladora da Administración Local de Galicia (LALGA)*
- *Lei 39/2015, de 1 de outubro, do Procedemento Administrativo Común das administracións públicas (LPACAP)*
- *Lei 40/2015, de 1 de outubro, do Réxime Xurídico do Sector Público (LRXSP)*
- *Lei 9/2017, de 8 de novembro, de Contratos do Sector Público, pola que se traspoñen ó ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP)*
- *Lei 9/2007, de 13 de xuño, de Subvencións de Galicia (LSG)*
- *Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)*
- *Bases de execución do orzamento da Deputación para o exercicio 2022*
- *Ordenanza Xeral de Subvencións da Deputación de Pontevedra (Ordenanza Xeral)*

Consideracións Xurídicas:

Competencia:

- *Artigo 25.2.d) da LRBRL, en concordancia co artigo 80.2.d) da LALGA que atribúe ás administracións municipais a competencia en materia de infraestrutura viaria e outros equipamentos da súa titularidade, así como da ordenación, xestión, execución e disciplina urbanística; a promoción e xestión de vivendas; os parques e xardíns; a pavimentación de vías públicas urbanas e a conservación de camiños e vías rurais.*
- *Artigo 31 da LRBRL, que encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e cooperación económica ós concellos. A estes efectos, a Deputación asegura o acceso da poboación da provincia ó conxunto dos servizos mínimos de competencia municipal mediante calquera fórmula de asistencia e cooperación municipal, para o que poderá outorgar subvencións ou axudas con cargo ós seus recursos propios para a realización e mantemento de obras e servizos municipais.*

Petición e evacuación de informes:

- *Artigos 79 e 80 da LPACAP sobre a petición e a evacuación de informes.*
- *Artigo 88.6 da LPACAP, que sinala que a aceptación de informes ou ditames servirá de motivación á Resolución cando se incorporen ó texto da mesma.*
- *Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.*
- *Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.*
- *Bases 47ª e 48ª de execución do Orzamento provincial para 2022, sobre o control e a*



fiscalización da xestión económica, que sinalan a competencia da Intervención para realizar esta función.

- *Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.*

Procedencia do convenio

- *Artigo 47 e seguintes da LRXSP, que dispón que o convenios de colaboración constitúen o instrumento adecuado para desenvolver a cooperación en cuestións de interese común.*
- *Artigo 57 da LRBRL que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.*
- *Artigo 198 da LALGA, que establece que as entidades locais poderán celebrar convenios de cooperación entre si para a máis eficaz xestión e prestación de servizos da súa competencia. No seu apartado 2º dispónse que a través dos convenios de cooperación as partes poderán coordinar as súas políticas de fomento dirixidas a un mesmo sector e distribuír as subvencións outorgadas por unha delas. No apartado 3º sinalase que, en especial, as Deputacións Provinciais poderán subscribir, cos municipios da provincia, convenios para garantir o acceso da poboación ó conxunto dos servizos municipais.*
- *Artigos 199 da LALGA, que en consonancia co artigo 49 da LRXSP sinala as especificacións que deberán conter os instrumentos de formalización dos convenios.*
- *Artigo 6 da LCSP, que exclúe do seu ámbito de aplicación os convenios de colaboración que celebre a Administración Xeral do Estado coas entidades xestoras e servizos locais, organismos autónomos e restantes entidades públicas, ou os que subscriban estes organismos e entidades entre si, salvo que, pola súa natureza, teñan a consideración de contratos suxeitos a dita lei.*
- *Artigo 2 da LXS, polo que a achega económica da Deputación de Pontevedra ten o carácter dunha subvención. O artigo 22.2 da LXS sinala que se poderán conceder de forma directa as subvencións previstas nominativamente nos orzamentos das Entidades Locais, nos termos recollidos nos convenios e na normativa reguladora destas subvencións. Neste senso, a Deputación, para o desenvolvemento das actuacións que se describen no convenio, ten consignado expresamente no estado de gastos do orzamento provincial do exercicio 2022, dotación orzamentaria na aplicación 2022/942.9420.762.14 e designado como beneficiario ó concello.*
- *Artigo 28.1 da LXS que establece que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.*

CONCLUSIONES



En base ás precedentes consideracións e ó interese público que representa esta actuación para a cidade de Pontevedra, da veciñanza e resto de potenciais visitantes da cidade, o Concello de Pontevedra e a Deputación Provincial de Pontevedra conveñen a súa colaboración neste ámbito co obxecto de desenvolver un réxime de colaboración entre ambas administracións locais para levar a cabo a execución das actuacións de remodelación do viario perimetral da praza de Barcelos.

Neste senso os convenios de colaboración constitúen o instrumento idóneo para canalizar esta colaboración.

O Concello de Pontevedra presentou a documentación necesaria para formalizar este convenio e quedan acreditadas no expediente as razóns de oportunidade, a valoración económica das actuacións a desenvolver e o propio obxecto do convenio.

Por todo o exposto e á vista dos antecedentes e fundamentos de dereitos aplicables, INFORMO FAVORABLEMENTE a tramitación do “CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA LEVAR A CABO A REMODELACIÓN DO VIARIO PERIMETRAL DA PRAZA DE BARCELOS”.

RÉXIME COMPETENCIAL:

De conformidade co disposto no artigo 10.4 da LXS, que sinala que a competencia para conceder subvencións nas corporacións locais correspóndelle ós órganos que teñan atribuídas tales funcións na lexislación de réxime local, en virtude do establecido no artigo 33 da LRBRL e na base 16^a.3.b) das Bases de Execución do Orzamento provincial, compételle ao Pleno a autorización e disposición dos gastos plurianuais cando non se cumbran os límites establecidos no artigo 174 do TRLRFL.

Este informe non ten carácter vinculante, de feito que o órgano concedente co seu superior criterio decidirá.

Á vista dos informes da xefa do Servizo de Cooperación e da Intervención Provincial; e visto o ditame da Comisión Informativa de Cooperación Municipal, Cooperación Transfronteiriza e Cohesión Social; o Pleno ACORDA por _____:

- *APROBAR o “CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA LEVAR A CABO A REMODELACIÓN DO VIARIO PERIMETRAL DA PRAZA DE BARCELOS” cuxo texto literalmente transcrito di como segue:*

“CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA LEVAR A CABO AS OBRAS DE REMODELACIÓN DO VIARIO PERIMETRAL DA PRAZA DE BARCELOS



En Pontevedra, na data da sinatura electrónica

INTERVEÑEN

Dunha parte, dona María del Carmen Silva Rego, presidenta da Deputación Provincial de Pontevedra, na representación legal que da mesma lle atribúe o artigo 34.1.b) da Lei 7/1985, de 2 de abril, reguladora das bases de réxime local (LRBRL).

Doutra, don Miguel Anxo Fernández Lores, alcalde-presidente do Concello de Pontevedra, na representación legal que do mesmo lle atribúe o artigo 124.4.a) do mesmo texto legal.

E actuando don Carlos Cuadrado Romay, en calidade de secretario xeral da Deputación Provincial de Pontevedra, e don José Carlos Castiñeira Piñeiro en calidade de secretario do Concello de Pontevedra, dando fe do acto que se celebra.

Ámbalas dúas partes actúan nas representacións expresadas e recoñécense reciprocamente capacidade bastante para o outorgamento e formalización deste convenio, con base nos principios de colaboración, cooperación, coordinación e eficacia que deben presidir as actuacións das Administracións Públicas e, de común acordo,

EXPOÑEN

I. Que a Deputación e o Concello de Pontevedra comparten como criterio que os concellos, como administración democraticamente escollida, deben ser os axentes protagonistas nos eidos administrativos aos que ten que corresponder a decisión, o deseño e o impulso da acción local e do desenvolvemento das políticas locais; ao tempo que as deputacións deben actuar como institucións que desenvolvan políticas, plan e actuacións que faciliten que concellos e cidadanía poidan acadar os mesmos dereitos e servizos.

II.- Que a tales efectos, a Deputación e o Concello de Pontevedra veñen coordinando as súas competencias mediante a sinatura de protocolos e convenios de colaboración para afondar na cooperación administrativa entrámbalas institucións e, particularmente, na cooperación destinada á planificación e execución de proxectos de interese xeral e infraestruturas públicas, tales coma as referidas aos servizos á cidadanía e infraestruturas deportivas ou viarias, entre outras de carácter diverso.

III.- Que ambas administracións locais teñen como obxectivo común satisfacer as necesidades e aspiracións da veciñanza, entre os que se atopan tráfico, estacionamento de vehículos, mobilidade así como a infraestrutura viaria e outros equipamentos de titularidade municipal. A finalidade é a consecución dun obxectivo de claro interese público consistente na remodelación do viario perimetral da praza de Barcelos. Esta intervención permitirá unha



reorganización do espazo público acorde cos principios e criterios da rede Ágora, dotándoo dunha maior seguridade e accesibilidade.

IV. Que o artigo 25.2.d) da Lei 7/1985, de 2 de abril, Reguladora das Bases de Réxime Local, e en sentido semellante o artigo 80 da Lei 5/1997, do 22 de xullo, de Administración Local de Galicia establecen que o municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal nos termos establecidos neste artigo, exercendo en todo caso como competencias propias e esenciais, nos termos da lexislación do Estado e das Comunidades Autónomas, en materia de infraestruturas e equipamentos de titularidade municipal.

Por outra banda, o art. 36.1.c) da dita Lei encomenda ás deputacións o aseguramento da prestación integral e adecuada dos servizos de competencia municipal; competencia en relación coa cal a Deputación ten previsto na súa planificación a mellora das infraestruturas e equipamentos dos concellos da provincia a fin de maximizar o benestar social do conxunto da cidadanía mediante o acceso a infraestruturas públicas seguras, sostibles e respectuosas co medio ambiente.

V. Que a Deputación, nos orzamentos do ano 2022, recolle unha aplicación orzamentaria, no capítulo de transferencias de capital, para convenios co Concello de Pontevedra.

VI. Que os convenios entre Administracións Públicas constitúen o instrumento axeitado para desenvolver a súa cooperación en cuestións de interese común, tal como establecen os artigos 47 e seguintes da Lei 40/2015, de 1 de outubro, do réxime xurídico do sector público; o artigo 57 da LRBRL; os artigos 198 e seguintes da Lei 5/1997, de 22 de xullo, de administración local de Galicia; así como no disposto nos artigos 28.1 da Lei 38/2003, de 17 de novembro, xeral de subvencións, e 26.1 da Lei 9/2007, de 13 de xuño, de subvencións de Galicia.

VII. Que a lexislación vixente en materia de réxime local encomenda ás Deputacións a que dirixan a súa actividade a asegurar a prestación integral e adecuada dos servizos de competencia municipal, a tal efecto e co fin de posibilitar a consecución real e efectiva dos mesmos, é polo que instrumenta este convenio dirixido ao cumprimento das obrigas impostas pola normativa vixente.

VIII.- Que a achega económica da Deputación de Pontevedra ten o carácter dunha subvención, en virtude do disposto no artigo 2 da Lei 38/2003, de 17 de novembro, Xeral de Subvencións (LXS), séndolle de aplicación o réxime xurídico das subvencións. Neste senso, á vista do artigo 22.2 acredítanse na memoria do expediente razóns de interese público, social e económico



suficientes que xustifican a súa concesión, tanto de natureza competencial como pola necesidade de apoiar e complementar a capacidade económica do concello e polo interese veciñal das actuacións. Asemade, no artigo 28.1 da LXS establécese que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.

IX.- Que, de acordo coas precedentes consideracións e en desenvolvemento dos principios de colaboración e cooperación, a Deputación de Pontevedra e o Concello de Pontevedra establecen como un dos seus obxectivos estratéxicos a actuación coordinada de apoio en materia de equipamentos e infraestruturas de titularidade municipal e acordan aprobar o presente convenio de colaboración, que asinan os aquí comparecentes, con arranxo as seguintes

CLÁUSULAS

PRIMEIRA.- OBXECTO DO CONVENIO

O obxecto do presente convenio é o de establecer as bases para a colaboración económica entre a Deputación Provincial e o Concello de Pontevedra para a remodelación do viario perimetral da praza de Barcelos, regulando as obrigas e compromisos de cada unha das partes asinantes.

SEGUNDA. FINANCIAMENTO

O investimento obxecto do presente convenio ascende a cantidade total de DOUS MILLÓNS SETENTA E UN MIL OITOCENTOS SETENTA E SEIS EUROS (2.071.876,00 €), IVE engadido, que se corresponde co orzamento de execución da obra obxecto da colaboración pactada, que será financiado integramente pola Deputación de Pontevedra nas anualidades 2022 e 2023, contra a aplicación 2022/942.9420.762.14 e a correspondente aplicación do orzamento do organismo provincial do ano 2023 quedando, en todo caso, condicionada a eficacia do convenio á existencia de crédito adecuado e suficiente logo da aprobación do orzamento do exercicio 2023.

O investimento previsto comprende todos os gastos que se derivan da execución das obras a realizar, excluídos os da redacción dos proxectos, que foron realizados polo Concello de Pontevedra, e autorizados, no seu caso, pola Deputación de Pontevedra mediante a súa aprobación polo órgano provincial competente.



O financiamento necesario para a realización da obra comprendida neste convenio realizarase da seguinte forma:

	2022	2023	TOTAL
Deputación de Pontevedra (100%)	1.208.594,33€	863.281,67€	2.071.876,00€

A achega provincial consiste nunha contía máxima que ascende ao importe sinalado anteriormente, polo que os posibles incrementos que puidesen producirse no orzamento de execución das obras que deriven do procedemento de contratación administrativa ou da execución do contrato, así como das súas posibles modificacións, asumiranse exclusivamente polo Concello de Pontevedra.

No caso de que o investimento realizado teñan un custo inferior ao inicialmente previsto e sempre que isto non supoña unha execución deficiente da totalidade do proxecto, a contía da subvención reducirase proporcionalmente, manténdose constante a porcentaxe de axuda respecto ao custo total do investimento.

TERCEIRA. EXECUCIÓN

1. A execución das actuacións e contratos á que se refire o presente convenio, terá lugar durante os anos 2022 e 2023 de acordo coas obrigas de financiamento indicadas na cláusula segunda.

Non obstante, o eventual reaxuste das anualidades da execución dos citados contratos poderá dar lugar ao reaxuste da anualidade do presente convenio, a cuxo efecto o Concello de Pontevedra, previa proposta da Comisión de Seguimento do convenio, dará audiencia á Deputación no expediente que se inicie para o reaxuste da anualidade de calquera dos ditos contratos e da resolución que se dite.

2. O proxecto técnico aprobado polo Concello de Pontevedra e que se achega ao presente convenio, determina o ámbito de actuación do convenio.

3. A Deputación poderá inspeccionar as actuacións obxecto do presente convenio cando o teña por conveniente, así como formular as observacións que estime pertinentes, sen prexuízo de que corresponda en exclusiva ao órgano de contratación e ao responsable do contrato a emisión das ordes e instrucións que procedan.



4. *As actuacións realizadas no marco do convenio estarán sometidas á comprobación explícita da execución das obras por parte dos servizos técnicos da Deputación. A dita comprobación material é un requisito imprescindible do que debe quedar constancia no expediente xustificativo.*

5. *Cando rematen as obras, o Concello de Pontevedra comunicará á Deputación Provincial a data e hora en que terá lugar o acto de recepción destas, ao que asistirá, de consideralo procedente un representante da Corporación provincial. A Administración municipal remitirá á provincial copia da acta do dito acto de recepción e a certificación dos acordos municipais que aproben a recepción das obras executadas e a certificación final destas.*

CUARTA. XUSTIFICACIÓN E PAGAMENTO

A achega ao Concello de Pontevedra farase efectiva mediante transferencia bancaria, unha vez presentada a seguinte documentación:

- Facturas rexistradas no punto xeral de entrada de facturas electrónicas da Administración Xeral do Estado (FACE) ou plataforma similar.*
- O acordo municipal de aprobación da certificación de obra e da factura correspondente.*
- Certificacións de obra executada.*

Xunto coa primeira certificación achegarase a seguinte documentación:

- Unha copia da acta de comprobación de replanteo.*
- Unha proba gráfica da difusión dada ao investimento que se financia coa axuda da Deputación.*
- O nomeamento do Director de obra e coordinador de seguridade e saúde*
- O contrato de adxudicación da obra.*
- Declaración do conxunto de axudas solicitadas, tanto as aprobadas ou concedidas como as pendentes de resolución, para o financiamento do obxecto deste convenio, das distintas administracións públicas competentes ou calquera dos seus organismos, entes ou sociedades.*
- O acordo ou resolución de aprobación do proxecto técnico do investimento.*

Xunto coa última certificación achegaranse:

- Informe final da ou do director de obra.*



- *De producirse a tramitación dun modificado, a certificación expedida pola persoa funcionaria competente de que a súa tramitación foi consonte a Lei de contratos.*
- *Acta de recepción.*
- *Unha proba gráfica da difusión dada ao investimento que se financia coa axuda da Deputación.*
- *Declaración do conxunto de axudas solicitadas, tanto as aprobadas ou concedidas como as pendentes de resolución, para o financiamento do obxecto deste convenio, das distintas administracións públicas competentes ou calquera dos seus organismos, entes ou sociedades.*
- *Calquera outra documentación esixible pola normativa vixente para a correcta xustificación deste convenio ou que se considere necesaria para a comprobación da correcta execución do obxecto do convenio.*
- *Xustificar no prazo máximo de catro meses, dende o fin das actuacións perante a Deputación as actuacións executadas.*

O concello poderá realizar xustificacións parciais, que responderán ao ritmo de execución do investimento, que se aboarán pola contía equivalente á xustificación presentada.

A documentación xustificativa verificarase polos servizos técnicos provinciais e fiscalizarase pola Intervención provincial antes de ser aprobadas e pagadas.

QUINTA. COMPROMISOS DO CONCELLO

O Concello de Pontevedra obrígase a:

- *Redactar e aprobar a documentación técnica pertinente e o correspondente proxecto de obra, asumindo o seu custo, e debendo remitila aprobada á Deputación.*
- *Aprobar o texto do convenio pola Xunta de Goberno Local, de conformidade co artigo 127.1.g) da Lei 7/1985, e remitir unha copia do acordo á Deputación.*
- *Obter as correspondentes licenzas e tramitar ante outros organismos as autorizacións pertinentes que fosen precisas.*
- *Licitar, dirixir, executar, controlar e recibir a obra segundo a documentación técnica pertinente e o correspondente proxecto técnico.*
- *Remitir, unha vez formalizado o contrato de obra, unha copia deste á Deputación, e comunicar a data e hora en que terá lugar a comprobación do replanteo, á que asistirá, de consideralo procedente un representante da Deputación.*



- *Xustificar perante a Deputación o investimento realizado mediante a expedición das correspondentes certificacións de obra aprobadas polo órgano competente do Concello; aboándose para cada certificación que se presente a parte proporcional en relación ao custo total do investimento.*
- *Comunicar á Deputación a data e hora en que terá lugar o acto de recepción das obras, ao que asistirá, de consideralo procedente, un representante da institución provincial.*
- *Dar a adecuada publicidade a este convenio, de tal xeito que quede constancia que as obras obxecto do presente convenio se levaron a cabo en colaboración coa Deputación.*
- *Levar a cabo o mantemento e conservación das infraestruturas obxecto deste convenio, tendo a asunción da dita responsabilidade desde o día seguinte ao da formalización da acta de recepción das obras coas obrigas establecidas na normativa patrimonial das administracións públicas.*
- *Destinar os fondos percibidos ao obxecto concreto para o que foron concedidos.*
- *Comunicar á Deputación de forma inmediata, a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía.*
- *Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ao Tribunal de Contas e ao Consello de Contas.*
- *Cumprir as obrigas contidas na Lei 9/2007, de 13 de xuño, de subvencións de Galicia, e en especial as recollidas no artigo 11 da mesma. Tamén será de aplicación o establecido no seu regulamento, aprobado por Decreto 11/2009, de 8 de xaneiro; na Lei 38/2003, de 17 de novembro, xeral de subvencións, e no seu regulamento, aprobado polo Real Decreto 887/2006, de 21 de xullo.*

SEXTA. COMPROMISOS DA DEPUTACIÓN

A Deputación obrígase a:

- *Financiar os custos derivados do convenio, ata a cantidade disposta na cláusula segunda, que será librada contra a presentación das correspondentes facturas ou documentos análogos acreditativos do gasto efectuado, así como da restante documentación xustificativa necesaria e logo da súa fiscalización pola Intervención provincial.*
- *Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden ao Tribunal*



de Contas e ao Consello de Contas, en cumprimento do disposto no artigo 53 da Lei 40/2015 e da Resolución Presidencial número 2017008767 de 8 de maio de 2017, tratándose así mesmo dun convenio cuxas achegas económicas exceden de 600.000,00€.

SÉTIMA. COMPATIBILIDADE CON OUTRAS SUBVENCIONS

Conforme ao disposto no artigo 40.1º, letra d) do Decreto 11/2009, de 8 de xaneiro, polo que se aproba o regulamento da Lei 9/2007, de 13 de xuño, de subvencións de Galicia, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.

Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actuación subvencionada.

OITAVA. PUBLICIDADE

En toda a documentación e informacións relativas á actuación á que se refire o presente convenio figurarán en todos os formatos os logotipos da Deputación e do Concello de Pontevedra.

As accións a desenvolver ao abeiro do convenio, deberán garantir un alto impacto e visibilidade da colaboración entre a Deputación e o Concello de Pontevedra.

No cartel de obra figurará a imaxe corporativa da Deputación Provincial e o financiamento da administración provincial ás obras obxecto do presente convenio.

Por outra parte, en cumprimento do establecido na Resolución de 15 de xuño de 2020, da Intervención Xeral da Administración do Estado, pola que se regula o proceso de rexistro e publicación de convocatorias no Sistema Nacional de Publicidade de Subvencións e Axudas Públicas, e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de Subvencións operará como sistema nacional de publicidade das subvencións. A tales efectos e para garantir o dereito da cidadanía a coñecer todas as subvencións convocadas en cada momento e cara a contribuír aos principios de publicidade e transparencia, a Intervención Xeral da Administración do Estado publicará na súa páxina web as subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.



NOVENA. COMISIÓN DE SEGUIMIENTO

Para o seguimento e coordinación da execución deste convenio e resolución das dúbidas que poidan producirse na súa interpretación crearase unha comisión integrada por dous representantes de cada unha das administracións asinantes, un dos cales terá carácter técnico. As súas funcións, entre outras, serán as seguintes:

- A puntual recepción de información sobre todas as actuacións que se produzan na execución do convenio a que este convenio se refire.*
- Impulsar e avaliar o cumprimento deste convenio proponendo as actuacións que se consideren precisas.*
- Propoñer a interpretación, no caso de dúbida, do seu contido.*
- Se xorden controversias na aplicación do convenio propoñerlles ás partes a súa resolución.*
- A resolución das dúbidas que presente a interpretación do convenio e, no seu caso, a emisión de informe se a dúbida ten que ser resolta polos órganos de goberno das administracións asinantes.*

A comisión reunirse cando o estime conveniente o seu responsable, por decisión propia ou a petición de calquera dos seus membros. As súas reunións terán lugar no Pazo Provincial da Deputación ou na Casa do Concello de Pontevedra. Na reunión constituínte da Comisión de Seguimento designarase ao seu responsable e ao seu secretario que levantará acta das súas reunións.

DÉCIMA. VIXENCIA

O investimento obxecto deste Convenio deberá estar executado e finalizado na data límite do 31/12/2023, fixándose un prazo de xustificación ata o 30/04/2024.

No caso de que, por motivos xustificados, ou como consecuencia do axuste das anualidades de execución do contrato, as obras obxecto do presente convenio non estivesen rematadas nesa data poderase estender súa vixencia, previa emisión do informe da Comisión de seguimento no que deberá especificar o prazo de prórroga.

DÉCIMA PRIMEIRA. EXTINCIÓN E CAUSAS DE RESOLUCIÓN



De acordo co previsto no artigo 51 da Lei 40/2015, do 1 de outubro, de réxime xurídico do sector público, o convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causas de resolución:

- O transcurso do prazo máximo de vixencia do convenio.*
- O acordo unánime dos asinantes.*
- O incumprimento das obrigas e compromisos asumidos por parte dalgún dos asinantes.*

Neste caso, notificarase á parte incumplidora un requirimento para que, no prazo que se sinala, cumpra coas obrigas ou compromisos que se consideran incumplidos. Este requirimento será comunicado tamén ao responsable da Comisión de Seguimento. Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.

- Por decisión xudicial declaratoria da nulidade do convenio.*
- Por calquera outra causa distinta das anteriores prevista no convenio ou noutras leis.*

DÉCIMA SEGUNDA. RÉXIME XURÍDICO E XURISDICIÓN COMPETENTE.

O presente convenio ten natureza administrativa e rexerese pola Lei 38/2003 e o Real Decreto 887/2006 nos seus preceptos básicos; a Lei 40/2015; a lexislación básica do Estado en materia de réxime local; a Lei 9/2007; os preceptos non básicos da Lei 38/2003 e do Real Decreto 887/2006; polos pactos que se conteñen neste convenio; polas Bases de Execución dos orzamentos das administracións asinantes e polas restantes normas de dereito administrativo, e no seu defecto, as normas de dereito privado.

Así mesmo, a falta de entendemento previo pola Comisión de Seguimento as partes quedan sometidas á xurisdición contencioso-administrativa na resolución de posibles controversias que puideran suscitar o incumprimento ou a interpretación do convenio.

E en proba de canto antecede, as partes que interveñen asinan o presente convenio na data da sinatura electrónica.

Pola Deputación Provincial

Polo Concello de Pontevedra

Asdo.- M^a Carmen Silva Rego

Asdo.- Miguel Anxo Fernández Lores



O Secretario da Deputación de Pontevedra

O Secretario do Concello de Pontevedra

Asdo.- Carlos Cuadrado Romay

Asdo.- José Carlos Castiñeira Piñeiro ”

- *FACULTAR á presidenta para formalizar o devandito convenio mediante a súa sinatura.*
- *DARLLE TRASLADO do presente acordo ó Concello de Pontevedra, á Intervención, ó Servizo de Cooperación, ó Gabinete da Presidencia e o Gabinete de Prensa. ”*

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por unanimidade, cos votos a favor dos/as deputados/as do Grupo Provincial do PSdeG-PSOE (8), do Grupo Provincial do BNG (2), e dos/as deputados/as do Grupo Provincial do Partido Popular (7), a proposta de acordo indicada “ut supra” .

4.- DITAMINAR A APROBACIÓN DA 1ª ADDENDA AO “CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA PARA A MELLORA E ACONDICIONAMENTO DOS PARQUES INFANTÍS DO CEIP A XUNQUEIRA I E CEIP MARCÓN, NA CIDADE DE PONTEVEDRA ” (expediente 2021047571)

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ó Ditame da Comisión Informativa de Cooperación Municipal, Cooperación Transfronteiriza e Cohesión Social a seguinte proposta de acordo con carácter previo á súa elevación ante o órgano competente para a súa aprobación:

“ASUNTO: APROBACIÓN DA 1ª ADDENDA AO “CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA PARA A MELLORA E ACONDICIONAMENTO DOS PARQUES INFANTÍS DO CEIP A XUNQUEIRA I E CEIP MARCÓN, NA CIDADE DE PONTEVEDRA

Do exame do expediente quedan acreditados os seguintes antecedentes:

- *Que en data 04/11/2021, a Deputación Provincial de Pontevedra e o Concello de Pontevedra asinaron un convenio cuxo obxecto era o de establecer as bases da colaboración técnica e económica, para mellorar a seguridade e a accesibilidade dos parques infantís do CEIP A Xunqueira I e CEIP Marcón e adaptalos ás necesidades das nenas e nenos en idade escolar destes espazos nos centros educativos de titularidade municipal.*



- *Que o 26/01/2022 o Concello de Pontevedra presenta unha solicitude de convocatoria da “Comisión de Seguimento ” do Convenio co obxecto de clarificar o prazo de execución das actuacións contempladas no mesmo.*
- *Que en data 18/02/2022 reúnese a “Comisión de Seguimento e Control”, prevista no pacto noveno do convenio, que ante a imposibilidade material de realizar no prazo previsto inicialmente as obras convenidas, acorda propoñer a adecuación do prazo de execución das actuacións e contratos tendo así lugar durante o ano 2021 e o ano 2022, modificándose, polo tanto, a redacción do pacto terceiro para axustalo á realidade de execución das obras recollidas no Convenio.*
- *Que recibida a documentación necesaria para a formalización da addenda por parte do Concello de Pontevedra, a proposta infórmase pola xefa do Servizo de Cooperación e pola Intervención Xeral provincial o 07/03/2022, logo de dar conta dos antecedentes e normativa de aplicación, a fiscalización e conformidade do expediente.*

FUNDAMENTOS XURÍDICOS

Lexislación aplicable

- *Lei 38/2003, de 17 de novembro, Xeral de Subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)*
- *Lei 7/1985, de 2 de abril, Reguladora das Bases do Réxime Local (LRBRL)*
- *Lei 5/1997, de 22 de xullo, reguladora da Administración Local de Galicia (LALGA)*
- *Lei 39/2015, de 1 de outubro, do Procedemento Administrativo Común das administracións públicas (LPACAP)*
- *Lei 40/2015, de 1 de outubro, do Réxime Xurídico do Sector Público (LRXSP)*
- *Lei 9/2017, de 8 de novembro, de Contratos do Sector Público, pola que se traspoñen ó ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP)*
- *Lei 9/2007, de 13 de xuño, de Subvencións de Galicia (LSG)*
- *Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)*
- *Bases de execución do orzamento da Deputación para o exercicio 2022*
- *Ordenanza Xeral de Subvencións da Deputación de Pontevedra (Ordenanza Xeral)*

Consideracións Xurídicas:

Competencia:

- *Artigo 25.2.n) da LRBRL, en concordancia co artigo 80.2.ñ) da LALGA que atribúe ás administracións municipais a competencia en materia de conservación, mantemento e vixilancia dos edificios de titularidade local destinados a centros públicos de educación infantil, de educación primaria ou de educación especial.*



- *Artigo 31 da LRBRL, que encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e cooperación económica ós concellos. A estes efectos, a Deputación asegura o acceso da poboación da provincia ó conxunto dos servizos mínimos de competencia municipal mediante calquera fórmula de asistencia e cooperación municipal, para o que poderá outorgar subvencións ou axudas con cargo ós seus recursos propios para a realización e mantemento de obras e servizos municipais.*

Petición e evacuación de informes:

- *Artigos 79 e 80 da LPACAP sobre a petición e a evacuación de informes.*
- *Artigo 88.6 da LPACAP, que sinala que a aceptación de informes ou ditames servirá de motivación á Resolución cando se incorporen ó texto da mesma.*
- *Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.*
- *Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.*
- *Bases 47ª e 48ª de execución do Orzamento provincial para 2021, sobre o control e a fiscalización da xestión económica, que sinalan a competencia da Intervención para realizar esta función.*
- *Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.*

Procedencia da addenda

- *Artigo 47 e seguintes da LRXSP, que dispón que o convenios de colaboración constitúen o instrumento adecuado para desenvolver a cooperación en cuestións de interese común.*
- *Artigo 57 da LRBRL que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.*
- *Artigo 198 da LALGA, que establece que as entidades locais poderán celebrar convenios de cooperación entre si para a máis eficaz xestión e prestación de servizos da súa competencia. No seu apartado 2º dispónse que a través dos convenios de cooperación as partes poderán coordinar as súas políticas de fomento dirixidas a un mesmo sector e distribuír as subvencións outorgadas por unha delas. No apartado 3º sínlase que, en especial, as Deputacións Provinciais poderán subscribir, cos municipios da provincia, convenios para garantir o acceso da poboación ó conxunto dos servizos municipais.*
- *Artigos 199 da LALGA, que en consonancia co artigo 49 da LRXSP sinala as especificacións*



que deberán conter os instrumentos de formalización dos convenios.

- *Artigo 4.1.c) do TRLCSP, que exclúe do seu ámbito de aplicación os convenios de colaboración que celebre a Administración Xeral do Estado coas entidades xestoras e servizos locais, organismos autónomos e restantes entidades públicas, ou os que subscriban estes organismos e entidades entre si, salvo que, pola súa natureza, teñan a consideración de contratos suxeitos a dita lei.*
- *Artigo 2 da LXS, polo que a achega económica da Deputación de Pontevedra ten o carácter dunha subvención. O artigo 22.2 da LXS sinala que se poderán conceder de forma directa as subvencións previstas nominativamente nos orzamentos das Entidades Locais, nos termos recollidos nos convenios e na normativa reguladora destas subvencións. Neste senso, a Deputación, para o desenvolvemento das actuacións que se describen no convenio, ten consignado expresamente no estado de gastos do orzamento provincial do exercicio 2021, dotación orzamentaria na aplicación 942.9420.762.14 e designado como beneficiario ó concello.*
- *Artigo 28.1 da LXS que establece que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.*

CONCLUSIONES

Visto que se cumpre co establecido na LRXSP acerca dos mecanismos de seguimentos, vixilancia e control da execución do convenio e dos compromisos adquiridos polos asinantes, de xeito que o reaxuste da anualidade da execución das actuacións e contratos a que se refire o convenio, suxéitase ós límites recollidos no seu artigo 49.

E visto que as circunstancias o aconsellan e que con elo non se prexudican dereitos de terceiros, INFORMO FAVORABLEMENTE a sinatura dunha addenda ó convenio de colaboración entre o Concello de Pontevedra e a Deputación Provincial de Pontevedra para levar a cabo a “MELLORA E ACONDICIONAMIENTO DOS PARQUES INFANTÍIS DO CEIP A XUNQUEIRA I E CEIP MARCÓN NA CIDADE DE PONTEVEDRA”, co fin de adecuar o prazo de execución das actuacións e contratos do mesmo.

RÉXIME COMPETENCIAL:

De conformidade co disposto no artigo 10.4 da LXS, que sinala que a competencia para conceder subvencións nas corporacións locais correspóndelle ós órganos que teñan atribuídas tales funcións na lexislación de réxime local, en virtude do establecido no artigo 33 da LRBRL e na Base 16º 2 das de Execución do Orzamento Provincial, compételle á Xunta de Goberno a autorización e disposición do gasto, e aprobación da addenda ao convenio.

Este informe non ten carácter vinculante, de feito que o órgano concedente co seu superior criterio decidirá.



En consecuencia, elévase a seguinte PROPOSTA DE ACORDO:

Á vista dos informes da xefa do Servizo de Cooperación e da Intervención Provincial, a Xunta de Goberno por _____, ACORDA:

- *APROBAR a “1ª ADDENDA AO CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA A MELLORA E ACONDICIONAMENTO DOS PARQUES INFANTÍS DO CEIP XUNQUEIRA I E CEIP MARCÓN, NA CIDADE DE PONTEVEDRA” cuxo texto literalmente transcrito di como segue:*

“1ª ADDENDA AO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA PARA A MELLORA E ACONDICIONAMENTO DOS PARQUES INFANTÍS DO CEIP A XUNQUEIRA I E CEIP MARCÓN, NA CIDADE DE PONTEVEDRA

En Pontevedra, na data da sinatura electrónica

INTERVEÑEN

Dunha parte, D^a María del Carmen Silva Rego, quen actúa no nome e representación da Deputación Provincial de Pontevedra, en virtude do seu cargo como Presidenta deste organismo e en función das atribucións que lle confiren o artigo 34 da Lei 7/1985, de 2 de abril, reguladora das bases do réxime local, e o artigo 105 da Lei 5/1997, de 22 de xullo, de administración local de Galicia.

E doutra parte, D. Miguel Anxo Fernández Lores, alcalde do Concello de Pontevedra, actuando en virtude das facultades que lle atribúe o artigo 124.1 e 124.4 da Lei 7/1985, de 2 de abril, reguladora das bases de réxime local.

E actuando D. José Carlos Castiñeira Piñeiro, en calidade de secretario do Concello de Pontevedra, e D. Carlos Cuadrado Romay, en calidade de secretario xeral da Deputación de Pontevedra, dando fe do acto que se celebra.

As partes recoñécense mutuamente plena lexitimación, representación e a capacidade legal necesaria para subscribir a presente addenda ó convenio de colaboración e, con tal fin,



EXPOÑEN

I.- Que en data 04 de novembro de 2021, a Deputación Provincial de Pontevedra e o Concello de Pontevedra asinaron un convenio de colaboración, cuxo obxecto era o de establecer as condicións de colaboración entre a Deputación e o Concello de Pontevedra para desenvolver a realización de obras de mellora e acondicionamento dos parques infantís dos centros públicos CEIP A Xunqueira I e CEIP Marcón, na cidade de Pontevedra, regulando as obrigas e compromisos de cada unha das partes asinantes na realización das seguintes actuacións:

- “MELLORA E ACONDICIONAMENTO DOS PARQUES INFANTÍS DO CEIP A XUNQUEIRA I E CEIP MARCÓN, NA CIDADE DE PONTEVEDRA”.

II.- Que o pacto terceiro do referido convenio establecía que a execución das actuacións e contratos á que se refire o presente convenio, terá lugar durante o ano 2021, de acordo coas obrigas de financiamento indicadas no pacto segundo.

Non obstante, o eventual reaxuste da anualidade da execución dos ditos contratos, poderá dar lugar ao reaxuste da anualidade do presente convenio, a cuxo efecto o Concello de Pontevedra, previa proposta da Comisión de Seguimento do convenio, dará audiencia á Deputación no expediente que se inicie para o reaxuste da anualidade de calquera dos ditos contratos e da resolución que se dite.

III.- Que en data 18 de febreiro de 2022, á vista dos antecedentes e da evolución administrativa do expediente conducente á execución do obxecto do convenio de referencia, reúnen os membros da “Comisión de Seguimento”, acordando por unanimidade a seguinte proposta para adaptar a redacción do pacto terceiro á realidade de execución das obras recollidas no Convenio:

Modificación da redacción do pacto TERCEIRO no seu paragrafo 1 no atinente ao prazo de execución por dar cabida a dúbidas interpretativas do Convenio de Colaboración entre a Deputación de Pontevedra e o Concello de Pontevedra para a “MELLORA E ACONDICIONAMENTO DOS PARQUES INFANTÍS DO CEIP A XUNQUEIRA I E CEIP MARCÓN, NA CIDADE DE PONTEVEDRA” quedando redactado como segue: “A execución das actuacións e contratos á que se refire o presente convenio, terá lugar durante o ano 2021 e o ano 2022, de acordo coas obrigas de financiamento indicadas no pacto segundo”, non alterando o resto do paragrafo e do pacto na súa redacción orixinaria.



IV.- Por todo o anteriormente exposto, as partes manifestan expresamente o seu desexo de asinar unha addenda ó convenio de colaboración co obxecto de plasmar que a execución das actuacións e contratos estenderanse durante o ano 2022 , cos seguintes pactos

PACTOS

PRIMEIRO.- *As partes, co obxecto de reaxustar a anualidade de execución das actuacións e contratos do “CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA PARA A MELLORA E ACONDICIONAMENTO DOS PARQUES INFANTÍIS DO CEIP A XUNQUEIRA I E CEIP MARCÓN, NA CIDADE DE PONTEVEDRA”, acordan modificar a redacción do pacto TERCEIRO no seu paragrafo 1, no atinente ao prazo de execución quedando redactado como segue:*

“1. A execución das actuacións e contratos á que se refire o presente convenio, terá lugar durante o ano 2021 e o ano 2022, de acordo coas obrigas de financiamento indicadas no pacto segundo.

Non obstante, o eventual reaxuste da anualidade da execución dos ditos contratos, poderá dar lugar ao reaxuste da anualidade do presente convenio, a cuxo efecto o Concello de Pontevedra, previa proposta da Comisión de Seguimento do convenio, dará audiencia á Deputación no expediente que se inicie para o reaxuste da anualidade de calquera dos ditos contratos e da resolución que se dite.

2. O proxecto técnico aprobado polo Concello de Pontevedra e que se achega ao presente convenio, determina o ámbito de actuación do convenio.

3. A Deputación poderá inspeccionar as actuacións obxecto do presente convenio cando o teña por conveniente, así como formular as observacións que estime pertinentes, sen prexuízo de que corresponda en exclusiva ao órgano de contratación e ao responsable do contrato a emisión das ordes e instrucións que procedan.

4. As actuacións realizadas no marco do convenio estarán sometidas á comprobación explícita da execución das obras por parte dos servizos técnicos da Deputación. A dita comprobación material é un requisito imprescindible do que debe quedar constancia no expediente xustificativo.”

A presente addenda entrará en vigor na data da súa sinatura.



SEGUNDO.- En todo o demais, o texto do convenio asinado en data 04 de novembro de 2021 mantense invariable, suxeitándose as partes aos seus pactos.

E para que así conste, en proba de conformidade, as partes asinan a presente addenda e a un só efecto no lugar e data sinalados no seu encabezamento.

*A Presidenta da Deputación Provincial de
Pontevedra*

Asdo.: M^a Carmen Silva Rego

*O Alcalde-Presidente do Concello de
Pontevedra*

Asdo: Miguel Anxo Fernández Lores

*O Secretario Xeral da Deputación de
Pontevedra*

Asdo.: Carlos Cuadrado Romay

O Secretario do Concello de Pontevedra

Asdo.: José Carlos Castiñeira Piñeiro ”

- FACULTAR á presidenta para formalizar a devandita addenda mediante a súa sinatura.*
- DARLLE TRASLADO do presente acordo ao Concello de Pontevedra, á Intervención, ao Servizo de Cooperación, ao Gabinete da Presidencia e ao Gabinete de Prensa. ”*

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por unanimidade, cos votos a favor dos/as deputados/as do Grupo Provincial do PSdeG-PSOE (8), do Grupo Provincial do BNG (2), e dos/as deputados/as do Grupo Provincial do Partido Popular (7), a proposta de acordo indicada “ut supra” .

5.- DITAMINAR A MOCIÓN DO GRUPO PROVINCIAL DO PARTIDO POPULAR PARA APROBAR UN PLAN ESPECÍFICO DE APOIO AOS CONCELLOS ANTE O INCREMENTO DO GASTO CORRENTE PROVOCADO POLO PREZO DA LUZ, DO GAS, DO COMBUSTIBLE E DO SUBMINISTRO DE MATERIAIS

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ó Ditame da Comisión Informativa de Cooperación Municipal, Cooperación Transfronteiriza e Cohesión Social a seguinte moción con carácter previo a súa elevación ó Pleno:



“O grupo provincial do Partido Popular, e no seu nome o deputado Jorge Cubela López, ante o pleno da Deputación de Pontevedra presenta para o seu debate e, se procede, aprobación a seguinte:

MOCIÓN PARA APROBAR UN PLAN ESPECÍFICO DE APOIO AOS CONCELLOS ANTE O INCREMENTO DO GASTO CORRENTE PROVOCADO POLO PREZO DA LUZ, DO GAS, DO COMBUSTIBLE E DO SUBMINISTRO DE MATERIAIS

A invasión de Rusia sobre Ucraína está provocando unha grave crise humanitaria, pero tamén está alterando de xeito importante a nosa economía. A tarifa eléctrica, que leva á alza desde hai un ano, alcanzou o pasado 8 de marzo máximos históricos de 544,98 euros/MWh, que sumado ao incremento descontrolado do combustible e do gas e, como consecuencia do anterior, ao aumento do prezo dos subministros e materiais de obra para os mantementos, están mermando as economías domésticas, a competitividade das empresas e, tamén, está asfixiando aos concellos. As previsións máis optimistas calculan que o gasto corrente nos concellos incrementarase de media un 40%, situación que provocará unha crise moi grande para as entidades locais.

Concellos pequenos da provincia, onde os orzamentos municipais xa están moi axustados, e en situacións normais, o gasto corrente xa ocupa a parte máis importante dos ingresos, serán incapaces de asumir este aumento dos prezos. Un aumento sen control que pode provocar o peche de instalacións municipais, que se deixen de prestar servizos fundamentais para os veciños ou levar as arcas municipais a situacións límites. O alumeadado público, o mantemento das depuradoras, a recollida do lixo, as reparacións de albanelaría, mellora de camiños... son servizos directos afectados por este incremento dos prezos, pero hai outros moitos que tamén que, indirectamente e pola diminución dos recursos dispoñibles, poden verse prexudicados. Servizos básicos como os servizos sociais, xa afectados pola pandemia sanitaria e que, aínda sen estar resolta a situación, estase agravando aínda máis.

Polo tanto, este incremento do prezo da luz, do gas, dos combustibles e dos subministros está alterando a economía dos concellos, e as familias veranse afectadas dobremente, non só pola repercusión directa que estes prezos desorbitados teñen na súa cesta da compra e na súa economía familiar, senón tamén porque moitos dos servizos públicos que reciben poden verse alterados.

Non debemos esquecer que estamos nun momento especialmente delicado, onde ademais se multiplican tamén as axudas de emerxencia social de familias en situación de vulnerabilidade que son incapaces de asumir o gasto eléctrico, ou familias que aínda están padecendo as consecuencias económicas provocadas pola crise sanitaria e que precisan axudas para alimentos, cuxo custe se está incrementando aproximadamente nun 22%, para pagar a súa vivenda, etc.



Os concellos non deixamos atrás a ninguén, como así se demostrou nos últimos dous anos, e por iso é fundamental que a Deputación de Pontevedra faga un esforzo e colabore cos concellos para financiar de xeito extraordinario ese incremento do gasto corrente, e que os concellos poidan destinar eses recursos para seguir cubrindo esas necesidades mínimas e básicas para a poboación.

A preocupación nos concellos é evidente e por iso consideramos que a Deputación de Pontevedra non só debe compartir esta inxuedanza, senón que como institución máis próxima ás entidades locais e que debe prestar asistencia e cooperación xurídica, económica e técnica aos concellos, en especial aos de menor capacidade económica e de xestión, debe dar un paso cara adiante e poñer a disposición dos concellos pequenos e medianos un plan económico específico para que poidan facer fronte a estes gastos imprevistos.

Por todo isto, elevamos ó pleno da Deputación Provincial de Pontevedra os seguintes

ACORDO

Aprobar un plan económico específico para apoiar aos pequenos e medianos concellos da provincia ante o aumento esaxerado do gasto corrente, producido principalmente polo incremento do prezo da luz, dos combustibles e dos subministrados de materiais.

Pontevedra, 15 de marzo de 2022

Asdo. Dixitalmente: Jorge Cubela López”

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina desfavorablemente a referida moción cos votos en contra dos/as deputados/as do Grupo Provincial do PSdeG-PSOE (8) e do Grupo Provincial do BNG (2), e a favor do Grupo Provincial do Partido Popular (7).

6.- ROGOS E PREGUNTAS

Non houbo.

E non habendo máis asuntos que tratar, a Presidencia dá por finalizada a reunión, sendo as doce horas e dez minutos, do que, como secretaria, dou fe.

Pontevedra, na data da sinatura electrónica

A Secretaria da Comisión,
(documento asinado electronicamente)
Marina Piñeiro Novo

